

БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ
ПРЕДСТАВНИЧКИ ДОМ
Клуб посланика СДП БиХ



BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
PREDSTAVNIČKI / ZASTUPNIČKI DOM
Klub poslanika/zastupnika SDP BiH

Sarajevo, 01.09.2025. godine

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 01-09-2025			
Organizaciona jedinica	Klasifikaciona oznaka	Redni broj	Broj priloga
01-	02-2-	1910	125

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM

n/r predsjedavajućeg

Predmet: Prijedlog rezolucije o zaštiti civila, humanitarnoj pomoći i slobodi izvještavanja medija u Palestini, dostavlja se

Na osnovu člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“ br. 79/14, 81/15 i 97/15, 78/19, 26/20, 53/22, 59/23, 87/23, 50/24 i 73/24), podnosim **Prijedlog rezolucije o zaštiti civila, humanitarnoj pomoći i slobodi izvještavanja medija u Palestini**, radi razmatranja i usvajanja u Predstavničkom domu Parlamentarne skupštine BiH.

U prilogu dostavljam tekst Rezolucije na bosanskom jeziku, u skladu sa odredbama Poslovnika Predstavničkog doma Parlamentarne skupštine BiH.

S poštovanjem,

Poslanik SDP BiH
Saša Magazinović

PRIJEDLOG

Polazeći od:

- *Povelje Ujedinjenih naroda, kojom se, pored ostaloga, potvrđuju temeljna načela međunarodnih odnosa, obaveza mirnog rješavanja sporova, poštovanje ljudskih prava i osnovnih sloboda, te očuvanje mira i sigurnosti;*
- *Univerzalne deklaracije o ljudskim pravima, kojom se svakom čovjeku priznaju jednaka i neotuđiva prava i slobode bez ikakve diskriminacije;*
- *Ženevskih konvencija i njihovih dopunskih protokola, koji utvrđuju pravila zaštite civila, ranjenika, bolesnika, ratnih zarobljenika i humanitarnog osoblja u oružanim sukobima;*
- *relevantnih rezolucija Generalne skupštine i Savjeta bezbjednosti Ujedinjenih naroda koje se odnose na Bliski istok, međunarodno humanitarno pravo i zaštitu civilnog stanovništva;*
- *vlastitog istorijskog iskustva, koje obavezuje na reakciju u pravcu zaštite ljudskih života i mirnog rješavanje sukoba;*

Na osnovu člana IV 4. (e) Ustava Bosne i Hercegovine, člana 163. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“ br. 79/14, 81/15 i 97/15, 78/19, 26/20, 53/22, 59/23, 87/23, 50/24 i 73/24) Predstavnički dom Parlamentarne skupštine Bosne i Hercegovine, je na sjednici održanoj _____. 2025. godine, usvojio

REZOLUCIJU

o zaštiti civila, humanitarnoj pomoći i slobodi izvještavanja medija u Palestini

1. Zahtijevamo hitan i bezuslovan prekid svih ratnih dejstava, posebno u Pojasu Gaze, uključujući obustavu oružanih napada iz zraka, sa kopna i mora, kao i raketiranja i drugih oblika oružanog djelovanja. Ovaj prekid vatre treba biti uspostavljen bez odlaganja, kako bi se stvorili uslovi za zaštitu civila, dopremu humanitarne pomoći i pokretanje ozbiljnih mirovnih pregovora.
2. Izražavamo duboku i trajnu zabrinutost zbog kontinuiranog i masovnog stradanja civila, uključujući djecu, žene i starije osobe, te podsjećamo da je zaštita civilnog stanovništva temeljna obaveza svih strana u oružanom sukobu u skladu s međunarodnim humanitarnim pravom.
3. Snažno i nedvosmisleno osuđujemo sve napade usmjerene protiv civila, uključujući neselektivne vojne operacije, napade na civilnu infrastrukturu i terorističke akte, naglašavajući da takva djela predstavljaju teška kršenja međunarodnog humanitarnog prava.

4. Pozivamo na hitno i efikasno poduzimanje svih potrebnih mjera od strane međunarodne zajednice, uključujući Vijeće sigurnosti Ujedinjenih naroda, kako bi se spriječila dalja stradanja civila, te obezbijedilo striktno poštovanje međunarodnog humanitarnog i ljudskog prava.

5. Snažno i nedvosmisleno osuđujemo korištenje izgladnjivanja i uskraćivanje pomoći kao ratne taktike.

6. Naglašavamo potrebu za potpunom i trajnom zaštitom humanitarnog osoblja, bolnica, ambulanti i drugih objekata od vitalnog značaja za preživljavanje civilnog stanovništva, te zahtijevamo omogućavanje brzog, sigurnog i potpunog dopremanja humanitarne pomoći uključujući hranu, lijekove, vodu, sklonište i gorivo svim pogođenim područjima.

7. Osuđujemo ubijanje i targertiranje novinara, fotoreportera, snimatelja i drugih medijskih radnika na terenu, te pozivamo na osiguravanje slobodnog, sigurnog i neometanog rada za njih, uključujući pravo pristupa svim područjima.

8. Podržavamo sve napore međunarodne zajednice, a naročito međunarodnu konferenciju koja će se održati u New Yorku u septembru 2025. godine pod predsjedavanjem Kraljevine Saudijske Arabije i Republike Francuske, usmjerene ka postizanju pravednog i trajnog mira, u skladu sa principom dvodržavnog rješenja, koji će osigurati sigurnost, dostojanstvo i pravo palestinskog naroda, kao i svih drugih naroda u regiji, da žive u miru, slobodi i međusobnom poštovanju, u skladu s međunarodnim pravom i relevantnim rezolucijama UN-a.

9. Pozivamo na obustavu ubijanja, hapšenja, uništavanja, kolektivnih kažnjavanja, gradnje ilegalnih naselja na Zapadnoj obali, te ponavljanih napada na islamska i kršćanska sveta mjesta u Jerusalemu.

10. Izražavamo spremnost Bosne i Hercegovine da, u skladu sa svojim institucionalnim i materijalnim mogućnostima, doprinese humanitarnim naporima, inicijativama za prekid vatre i mirovnim procesima.

11. Ova rezolucija stupa na snagu danom donošenja, a bit će objavljena u „Službenom glasniku BiH“.

Broj:

Datum: __. __. 2025. godine

Predsjedavajući
Predstavničkog doma
Parlamentarne skupštine BiH